

Grad Novi Pazar

Skupština grada

Odbornička grupa SDA Sandžaka

Novi Pazar

04. maj 2022. godine

P R E D S J E D N I K U
SKUPŠTINE GRADA NOVOG PAZARA

Na osnovu člana 44. stav 1. i člana 149. Statuta grada Novog Pazara („Službeni list grada Novog Pazara“, broj 6/19), člana 44. stav 1. i člana 138. stav 1. Poslovnika Skupštine grada Novog Pazara („Službeni list grada Novog Pazara“, broj 6/19) podnosimo **PRIJEDLOG ODLUKE O PODNOŠENJU INICIJATIVE ZA ODRŽAVANJE VANREDNIH LOKALNIH IZBORA U NOVOM PAZARU**, sa prijedlogom da se, shodno članu 109. Poslovnika Skupštine grada Novog Pazara, uvrsti u dnevni red na sjednici Skupštine grada koja će se održati 05. maja 2022. godine.

Predsjednik odborničke grupe

Ahmedin Škrijelj

Na osnovu člana 32. stav 1. tačka 1) i 20), člana 79. stav 1. tačka 1) i 2) Zakona o lokalnoj samoupravi („Službeni glasnik RS“, broj 129/2007, 83/2014 – dr. zakon, 101/2016 – dr. zakon i 47/2018), člana 46. stav 1. tačka 1) i 77) i člana 147. Statuta grada Novog Pazara, („Službeni list grada Novog Pazara“, broj 6/19), i člana 137. Poslovnika Skupštine grada Novog Pazara („Službeni list grada Novog Pazara“, broj 6/19), Skupština grada Novog Pazara na sjednici održanoj 05. maja 2022. godine, donosi

O D L U K U

o podnošenju inicijative za održavanje vanrednih lokalnih izbora u Novom Pazaru

Član 1.

Ovom odlukom pokreće se inicijativa za održavanje vanrednih lokalnih izbora u Novom Pazaru.

Član 2.

Skupština grada Novog Pazara konstatuje da lokalna vlast u Novom Pazaru ne uživa povjerenje građana Novog Pazara.

Skupština grada konstatuje da lokalna vlast u Novom Pazaru ne vrši kvalitetno i efikasno svoje povjerene nadležnosti i javne poslove i da u vršenju istih ne vodi računa o neposrednom, zajedničkom i opštem interesu građana.

Skupština grada konstatuje da je lokalna vlast u Novom Pazaru suprotno članu 5. stav 4. Ustava Republike Srbije potčinjena interesima političkih stranaka koje čine lokalnu skupštinsku većinu a ne građanima Novog Pazara.

Član 3.

Skupština grada Novog Pazara traži od Gradonačelnika Novog Pazara, odbornika i odborničkih grupa u Skupštini grada, političkih stranaka zastupljenih u Skupštini grada Novog Pazara, Ministarstva državne uprave i lokalne samouprave, Vlade Republike Srbije i Predsjednika Narodne skupštine Republike Srbije da preuzmu zakonom propisane radnje u cilju održavanja vanrednih lokalnih izbora u Novom Pazaru.

Član 4.

Ovu odluku dostaviti Predsjedniku Narodne skupštine Republike Srbije, Vladi Republike Srbije, Ministarstvu državne uprave i lokalne samouprave, Gradonačelniku Novog Pazara, Odbornicima u Skupštini grada Novog Pazara i političkim strankama zastupljenim u Skupštini grada Novog Pazara.

Član 5.

Ovu odluku objaviti u "Službenom listu grada Novog Pazara".

SKUPŠTINA GRADA NOVOG PAZARA

Broj:

U Novom Pazaru, _____. _____ 2022. godine

PREDSJEDNIK

Dr. Anela Šemsović

O B R A Z L O Ž E N J E:

Pravni osnov za donošenje odluke:

Pravni osnov za donošenje ove odluke je sadržan je u:

- članu 32. stav 1. tačka 1) i 20), Zakona o lokalnoj samoupravi;
- članu 79. stav 1. tačka 1) i 2) Zakona o lokalnoj samoupravi;
- članu 46. stav 1. tačka 1) i 77) Statuta grada Novog Pazara;
- članu 147. Statuta grada Novog Pazara;
- članu 137. Poslovnika Skupštine grada Novog Pazara.

Razlozi za donošenje odluke:

Razlozi za donošenje odluke sadržani su u činjenici da je postojeća politička struktura koja čini lokalnu vlast odnosno skupštinsku većinu u Novom Pazaru izgubila legitimitet da i dalje upravlja Gradom i vrši lokalnu vlast.

U slučaju kada se izgubi legitimitet da se u ime građana upravlja Gradom neophodno je građanima vratiti mandate da i pružiti im mogućnost da na slobodnim, demokratskim i fer izborima izaberu svoje predstavnike koji će imati legitimitno pravo da u budćnosti u ime građana vrše lokalnu vlast te da u skladu sa odredbama Zakona o lokalnoj samoupravi upravljaju javnim poslovima od neposrednog, zajedničkog i opšteg interesa za lokalno stanovništvo, kao i da upravljaju javnim poslovima koji su u njihovoj nadležnosti i od interesa za lokalno stanovništvo.

Na parlamentarnim izborima održanim 3. aprila 2022. godine političke stranke koje čine aktuelnu skupštinsku većinu u Novom Pazaru učestvovali su na izborima u okviru jedne izborne liste i ostvarili značajno slabiji rezultat u odnosu na lokalne i parlamentarne izbore održane 2020. godine.

U odnosu na prethodne parlamentarne izbore 2020. godine kada su osvojili 20.375 glasova na izborima održanim 2022. godine osvojili su 14.038 glasova što je za 6.337 glasova manje.

Ako se za poređenje uzmu rezultati lokalnih izbora 2020. godine kada su političke stranke skupštinske većine osvojile zajedno 23. 790 glasova (lista Evropski Novi Pazar Rasim Ljajić – 18.653 i lista Aleksandar Vučić – ZA NAŠU DECU - SNS - 5.317 glasova) onda se može nedvosmisleno utvrditi da je to 9.752 glasa manje u odnosu na izbore održane 2022. godine.

Pored gubitka političkog legitimiteta, koji je evidentan, postojeća skupštinska većina konstantno radi i djeluje suprotno Ustavu, zakonu i interesima građana te ne izvršava adekvatno svoje obaveze.

Kada vladajuće političke strukture izgube povjerenje, odnosno kada im građani načinom glasanja poruče da više nemaju pravo raditi bilo šta u njihovo ime onda se u demokratskim društvima vlast vrati narodu.

Donošenjem ove odluke, osigurava se pravo građana da biraju vlast kojoj vjeruju da će raditi i djelovati u najboljem interesu naroda.

Objašnjenje pojedinačnih rješenja propisanih ovom odlukom:

Član 1: Utvrđen je predmet odluke.

Član 2: Utvrđeni su pojedini razlozi za raspuštanje Skupštine grada i raspisivanje vanrednih lokalnih izbora u Novom Pazaru.

Član 3: Ovim članom zatraženo je od zakonom ovlaštenih lokalnih i državnih organa da u skladu sa zakonom propisanim nadležnostima preduzmu potrebne radnje u cilju održavanja vanrednih lokalnih izbora u Novom Pazaru.

Član 4: Propisana je obaveza dostavljanje ove odluke Predsjedniku Narodne skupštine Republike Srbije, Vladi Republike Srbije, Ministarstvu državne uprave i lokalne samouprave, Gradonačelniku Novog Pazara, Odbornicima u Skupštini grada Novog Pazara i političkim strankama zastupljenim u Skupštini grada Novog Pazara.

Član 5: Propisana je obaveza objavljivanja u ove odluke u „Službenom listu grada Novog Pazara“

Finansijska sredstva za sprovođenje ove odluke obezbijediće se u budžetu Grada Novog Pazara.